

Masnoon duaon

ka
Urdu tarjamah

Intekhaab o tarteeb
Moulana Muhammad Abdul Qawi

Nashir



Idara Ashraful Uloom Trust
Khaja bagh, saeedabad, Hyderabad.

Fazail e dua

Dua ke mana “bulane, pukarne aur haajat talab karne” ke hain. Allah ta'ala ne mehez apne fazl o karam se apne bandon ko apni hajatein talab karne ki na sairf ijazat, balke hidayat di hai. Is se bhi aage badh kar dua na kare aur haajat talab na karne waloon ko mutakabbir qarar de kar unki sakth tambeeh ki aur unpar gusse ka izhaar farmaya hai.

Quran e Kareem me hai ke “tum mujhe pukaro, mai jawaab dunga. Beshak jo loog meri bandagi karne yaani dua maangne se ghuroor ki wajah se eahteraaz karenge wo anqareeb zillat ke saath jahannam me dakhil honge”. Nabi e Kareem sallallahu alaihi wa sallam ne farmaya: “dua ebadat ka maghz hai”. Ek hadith me hai ke “dua hi ebadat hai”. Ek hadith me hai ke

“Allah ke nazdeek sab se pasandeedah amal dua hai”. Ek hadith me hai ke “jis ke liye dua ka darwaazah khool diya gaya yani dua ki toufeeq di gayi uske liye rehmat ke darwaaze khul gaye”. Ek hadith me hai ke “jo Allah se nahi maangta Allah ta’ala uspar ghussa hote hain”. Mazkoorah baal ahadith se dua ki ahmiyat o fazeelat ka khoob andaza hogaya hoga.

Adaab e dua

Dua agar cheh bohot hi badi neemat hai, lekin uske adaab bhi isi tarah ahem hain. Chand adaab zail me darj kiye jarahe hain.

1. Qabooliyat ke yaqeen ke saath dua maangi jaaye.
2. Jis tarah museebat me dua ka eahtemaam karte hain usi tarah khush haali aur be-fikri ke zamane me bhi dua ka eahtemaam kiya jaaye.

3. Jald baazi na kare maangta rahe.
4. Yeh na kahe ke mai dua kar raha hun aur qabool nahi hoti.
5. Haraam khane, peene aur pehenne se eahtiyaat kare.
6. Kisi ke liye bad-dua na kare. Na apne liye na doosron ke liye.
7. Pehle apne liye dua kare, phir dooron ke liye dua kare.
8. Dua se qabl aur baad durood e shareef ka eahtemaam kare.
9. Isi tarah dua me Allah ta'ala ki hamd o sana kare.
10. Dua ke khatam par ameen bhi kahe.
11. Haath utha kar dua maange, uske baad apne haathon ko apne chehre par phearle.

Yeh risalah

Yeh risalah Nabi e Kareem sallallahu alaihi wasallam ki pachpan (55) duaon ka urdu tarjamah hai, jo hadith ki

kitaabon se liya gaya hai. In duaon me duna wa aakhirat ki tammam bhalaiyon ki talab aur tamaam buraiyon se panaah shaamil hai. Aap sallallahu alaihi wa sallam ne yeh duaein arabi hi me maangi hai. Agarcheh Aap ke alfaaz e mubarakah hi me dua maangna afzal o behtar hai, magar aam aadmiyon, bil-khusoos mastooraat ko arabi zubaan nahi aati. Padhte hai to bhi samajh nahi paate. Unki sahoolat ke liye in duaon ka urdu tarjamah shaaya kiya gaya hai.

Mulla Ali qari rehmatullahi alaih ne aisi tamaam masnoon o masoor duaon ko “Al hizbul aazam” ke naam se jama karke 7 manzilon me taqseem kardiya hai. Taake rooz ek manzil ba-asaani padhi jasake. Us kitaab ke zariyeh arabi me bhi yaad karlein ya deekh kar padh liya karein. Bohot barkat hogi aur tamaam afaat o baliyyaat se mehfooz rahenge. Ba-shart yeh ke ham qate

rehme aur haraam khoori se ijtenaab karte rahein.

Dua maangne ki kaifiyat

Dua maangte waqt maangne waale ki ijz o niyaaz ki kaifiyat kya honi chahiye? Nabi e Kareem sallallahu alaihi wasallam ki ek dua se iska andaaza lagaya jasakta hai. Yeh Aap ki dua bhi hai aur ummat ke liye taleem o talqeen bhi hai ke ek bande ko Allah ke huzoor faryaad kaise alfaaz aur kis andaaz se karni chahiye. Wo dua yeh hai:

“Aye Allah ! tu meri baatein sun raha hai, aur meri haalat ko dekh raha hai, aur mere zaahir o baatin ko acchi tarah jaanta hai, meri koie baat tujhse dhaki chupi nahi hai. Mai museebat zadah aur mohtaaj hun. Tujhse faryaad karta hun, teri panaah talab karta hun, khouf zadah hun, apne gunaahon ka iqraar karta hun.

Aye Allah ! mai tujhse is tarah suwaal karta hun jaise koie be-kas suwaal karta hai. Aise gid-gidata hun jaise koie gunahgaar aurb ruswa aadmi gidgidata hai. Is tarah maangta hun jaise koie dukhi aur pareshaan haal maangta hai. Apni gardan ko tere saamne jhukaye huwe, aankhon se aansoo bahate huwe, farotani karte huwe aur naak ragadte huwe tujh se tera fazl chaahta hun”. (Kanzul ummaal)

Jo dua is qisam ke aajizanaah alfaaz aur mohtaaji wa niyaaz-mandi ke andaaz par maangi jaayegi to inshallah wo zaroor maqbool hogi.

Dua hai ke Allah ta'ala ham sab ko ji lagakar duaein maangne ki toufeeq ataa farmaye. Ameen...

Was salam

Muhammad Abdul Qawi

*Allahumma salli alaa
Muhammad wa ala aali
Muhammad wa baarik wa sallim*

1. Aye Allah ! meri deeni haalat durust farmade jispar meri khairiyat aur salaamati ka daar o madaar hai. Aur meri duniya bhi durust farmade jisme mujhe yeh zindagi guzaarna hai. Aur meri aakhirat bhi durust farmade jaha mujhe lout ke jaana aur hamesha rehna hai. Aur meri zindagi ko khair aur bhalayi me izafah aur ziyadati ka zariyah banade aur meri mout ko har shar se raahat aur hifazat ka waseelah banade. (Muslim)
2. Aye Allah ! hame duniya me bhi bhalayi ataa farma, aakhirat me bhi bhalayi ataa farma. Aur hame aatish e dozakh ke azaab se bacha. (Bukhari)
3. Aye Allah ! mai tujhse "hidayat, taqwa, paak daamani aur makhlooq ki

mohtaaji se hifazat” ka suwaal karta hun. (Muslim)

4. Aye Allah ! mujhe sihat o tandurusti, effazt o paak daamani, amaanat daari acche akhlaaq aur taqdeer se raazi rehne ki toufeeq ataa farma. (Baihaqi)

5. Aye Allah ! mera baatin mere zaahir se accha karde aur mere zaahir ko bhi salaah se araastah farmade. Aye Allah ! tu apne bandon ko (apne fazl o karam se) jo aise saaleh ghar waale, saaleh maal aur saaleh aoulaad ataa farmata hai jo na gumraah hon aur na doosron ke liye gumraah kun ho. Mai bhi tujhse un cheezon ka saail hun (Mujhe apne fazl o karam se yeh cheezein ataa farma). (Tirmidhi)

6. Aye Allah ! mujhe aisa karde ke mai teri neematon ke shukr ki azmat o ahmiyat ko samjhoon (taake phir shukr me kotaahi na karun) aur tera zikr kasrat se karun aur teri naseehaton ki pairwi

karun aur teri wasiyyaton aur hukmon ko yaad rakhoon (aur unki tameel se ghaflat na bartoon). (Tirmidhi)

7. Aye Allah ! tu meri madad farma, mere khilaaf (mere dushmano ki kaarwaiyon me unki) madad na farma. Meri himayat farma, (mere mukhalifeen ki) mere khilaaf himayat na farma. Apni lateef, khufiya tadbeerein mere haq me istemaal farma, mere khilaaf istemaal na farma. Mujhe theek raaste par chala aur siraat e mustaqeem par chalte rehna mere liye asaan farma. Jo kaie mujh par zulm o ziyaadati kare uske muqabale me meri madad farma. Aye mere parwardgaar ! mujhe apna khoob shukr karne waala, khoob zikr karne waala banade. Mujhe aap se khoob darne waala aur ita'at karne waala banade. Apne huzoor me aajizi aur niyaaz-mandi se jhukhne waala, nar dil banade aur apni baargaah e karam ki taraf rujoo

hone aur palatne waala banade. Aye mere rab ! meri toubah qabool farmale, mere gunahon ke mail kucheel ko dhode. Meri dua qabool farma, mere imaan ko mustahkam karde, meri zubaan ko theek chalne waali banade, mere dil ko hidayat bakshde aur mere seene ke keena kapat aur har qisam ke khoot ko nikaal de. (Tirmidhi)

8. Aye Allah ! mai tujhse har qisam ki khair aur bhalaayi maangti hun. Duniya ki khair bhi aur aakhirat ki khair bhi. Wo khair bhi maangti hun jisko mai jaanti hun aur wo bhi jisko mai nahi jaanti. Aur mai teri panaah chahti hun har qisam ke shar aur burayi se. Duniya ke shar se bhi aur aakhirat ke shar se bhi. Jisko mai jaanti hun us shar se bhi aur jisko mai nahi jaanti us se bhi. Aye mere Allah ! tere khaas bande aur payare Nabi sallallahu alaihi wasallam ne jis jis khair ka bhi tujhse suwaal kiya

mai tujhse uski saail hun aur jis cheez se unhone aap ki panaah chaahi hai mai bhi un cheezon se aap ki panaah chaahti hun. Aye Allah ! mai tujhse har aise qoul o amal ki saail hun jo mujhe jannat se qareeb karde. Aur mai tujhse panaah chaahti hun dozakh se aur har us qoul o amal se jo dozakh se qareeb karne waala ho. Aur aye Allah ! mai tujhse suwaal karti hun ke jo bhi faislah tu mere haq me farmaye wo mere liye khair aur bhalayi ka zaamin ho. (Note: Nabi e Kareem sallallahu alaihi wasallam ne yeh dua Hazrat Ayesha raziyaallahu anha ko sikhayi thi). (Ibne majah).

9. Aye Allah ! ham tujhse wo sab maangte hain jo tere Nabi Hazrat Muhammad sallallahu alaihi wasallam ne tujhse maanga hai. Aur ham un sab cheezon se teri panaah chaahte hain jinse tere Nabi Hazrat Muhammad sallallahu alaihi wasallam ne panaah

chaahi hai. Bas tu hi hai jis se madad chaahi jaaye, aur tere hi karam par mouqoof hai maqaasid aur muraadon tak pahunchna. Quwwat o taaqat bas Allah hi se milsakti hai. (Tirmidhi)

10. Aye Allah ! hamtujhse suwaal karte hain teri rehmat ko waajib kardene waale, aur teri maghfirat ko pukaar kar dene waale amaal ka aur har gunaah se mehfooz rehne ka aur har neeki ki toufeeq ka. Aur tujhse maangte hain jannat ka husool aur dozakh se najaat. (Mustadrak Hakim)

11. Aye Allah ! meri hifazat farma Islam ke saath, khade hone ki haalat me aur baithne ki haalat me aur sone ki haalat me. (Yani khade, baithe, sote har haal me imaan aur islam ke saath mehfooz rahun) Aur mere dushmano aur haasidon ko mujh par hasne ka mouqah na mile. Aye mere Allah ! tere haath me khair ke jo khazane hain mai

tujhse unko maangta hun aur tere qabze me jo shar hai us se mai teri panaah chahta hun. (Hakim)

12. Aye Allah ! mujhe shukr karne waala aur sabar karne waala bandah bana. Aur mujhe khud apni nigaah me to chota magar doosre logon ki nigaah me bada banade. (Musnad e bazzar).

13. Aye Allah ! mai tujhse istedaa' karta hun, tu mujhe un amaal ki toufeeq de jo tujhe mehboob hain, aur mujhe saccha tawakkul ataa farma aur mujhe apni zaat e paak ke saath husn e zan naseeb farma. (Abu nuaim).

14. Aye Allah ! apne zikr ke liye aur apni naseehat ke liye mere dil ke kaan khool de aur mujhe apni farma-bardari aur apne Rasool ? ki ita'at ki toufeeq naseeb farma. Aur apni muqaddas kitaab Quran e Majeed par amal ki toufeeq de. (Tabrani).

15. Aye Allah ! mai tujhse suwaal karta

hu sehhat o tandurusti ka imaan ke saath, aur suwaal karta hun imaan ka husn e akhlaaq ke saath, aur suwaal karta hun tujhse tamaam maqaasid me kamiyaabi ka aakhirat ki falaah ke saath, aur suwaal karta hun tujhse rehmat o aafiyat ka aur maghfirat o razamandi ka. (Hakim).

16. Aye Allah ! mai tujhse aisa imaan maangta hun jo mere dil me paiwast ho jaaye, aur aisa yaqeen e saadiq jiske baad yeh haqeeqat mera ilm banjaaye ke mujh par sirf wahi takleef aayegi jo tere mere liye likhdi hai. Aur mai tujhse istedaa karta hun ke mera yeh haal karde ke zindagi ka jo samaan tu mujhe de, mai us par dil se raazi rahun. (Bazzar).

17. Aye Allah ! meri har dushwaari ko asaan farmake mujh par meherbaani farma, saari dushwaariyon aur mushkilon ko asaan karna tere liye bikul asaan hai. Aur mai tujhse istedaa' karta

hun duniya aur aakhirat me sahoolat aur asaani ke liye aur kaamil aafiyat ke liye. (Tabrani).

18. Aye Allah ! mai tujhse maangta hun acche amaal karne ki toufeeq aur bure amaal ko chood dene ki toufeeq aur tere miskeen bandon ke saath muhabbat karne ki toufeeq. Aur aye Allah ! jab tera faisla kisi qoum ko fitna aur azaab me mubtala karne ka ho to mujhe us fitne me mubtala kiye baghair apni taraf uthale. (Muatta Imam Malik).

19. Aye Allah ! hamare saare kaamon ka anjaam behrat kar aur duniya ki ruswaayi aur aakhirat ke azaab se hame bacha aur hamari hifazat farma. (Musnad e Ahmad).

20. Aye Allah ! mere dil ko nifaaq se aur mere amaal ko riya ki aamezish se mere zubaan ko jhoot se aur meri aankhon ko khiyaanat se bilkul saaf karde. Tu aankhon ki khiyanat aur dilon

ke raazon ko bhi jaanta hai. Tujh se meri koie cheez makhfee nahi. (Hakeem tirmidhi)

21. Aye Allah ! mai tujhse maangta hun isteqaamat aur saabit qadmi deen ke maamale me, aur talab karta hun aala salahiyat aur soojh boojh me pukhtagi aur teri neematon ke shukr ki aur husn e ibaadat ki toufeeq. Aur taalib hun tujhse lisaan e sidq aur qalb e saleem ka. Aur teri panaah chaahta hun har us shar se jiska tujhe ilm hai. Aur saail hun har us khair aur bhalayi ka jo tere ilm me hai. Aur maafi aur maghfirat caahta hun apne un sab gunaahon se jo tujhe maloom hain. Tu saari poshida baaton ko bhi khoob jaanta hai. (Tirmidhi)

22. Aye Allah ! mere gunaah maaf farmade aur mere liye mere ghar me wus'at ataa farma, aur tune jo rizq mujhe ataa farmaya hai usme mere liye barkart de. (Tirmidhi)

23. Aye Allah ! mere gunaah maaf farmade aur mujhe baksh de. Mujhpe rehmat farma. Mujhe aafiyat aur aaraam aur chain naseeb farma. Aur mujhe rozi naseeb farma. (Ibne abi shaibah)

24. Aye Allah ! mujhe apni qudrat se aafiyat ataa farma aur mujhe apni rehmat ke saaye me le le, aur meri zindagi apni ita'at o ibaadat me poori karde (yaani mai zindagi ke aakhri lamhe tak teri ita'at o ibaadat karta rahun) Aur mere behtareen amal par mera khaatimah farma aur uske sile me mujhe jannat ataa farma. (Baihaqi)

25. Aye Allah ! mai tujhse tera fazl aur teri rehmat maangta hun. Bas tu hi fazl o rehmat ka maalik hai. (Tabrani)

26. Aye Allah ! mai tujhse maangta hun paak saaf zindagi aur dhang ki mout (jisme koie bad-numayi na ho) aur (aakhirat ki taraf) aisi muraja'at jisme ruswaayi aur fazeehat na ho. (Hakim).

27. Aye Allah ! jo kuch ilm tu ne mujhe ataa farmaya usko mere liye nafa mand bana de (yani mujhe uspar amal karne ki toufeeq de) aur mujhe wo ilm ataa farma jo mere liye naafe ho aur mere ilm me izaafa farma. Allah ke liye hamd o sataayish hai har haal me. Aur mai Allah ki panaah chaahta hun dozakhiyon ke haal se. (Tirmidhi, Ibne maajah)

28. Aye Allah ! mujhe pal bhar ke liye mere nafs ke hawale na kar. Aur jo koie acchi cheez (accha amal ya accha haal) tu ne mujhe ataa farmaya hai usko mujhse waapas na le. (Bazzar)

29. Aye Allah ! mere budhape ke dino me aur meri umar ke aakhri hisse me meri rozi me ziyadah se ziyadah wusa't farma. (Mustadrak Hakim)

30. Aye Allah ! meri umar ke aakhiri hisse ko meri zindagi ka behtareen hissa karde. Aur mera aakhri amal meri

zindagi ka behtareen amal ho. Aur mera sab se accha din wo ho jo tere huzoor meri haazri ha din ho. (Tabrani)

31. Aye Allah ! ham ko baksh de. Ham par rehmat farma aur dozakh se hame bachale. Aur hamare halaat aur jumlah muamalaat durust farmade. (Ahmad)

32. Aye Allah ! hamari tadaad me ziyadati aur izaafah farma, kami na farma. Hame izzat o azmat ataa farma, hamari ihaanat o zillat na farma. Hame apni har tarah ki neematein ataa farma, hame mehroom na farma. Hame apnale. Hamare myqabale me doosron ko tarjeeh na de. Ham se raazi hoja aur hame khush karde. (Tirmidhi)

33. Aye Allah ! hamre aapas ke talluqaat durust farmade aur hamare dilon ko jood de aur hame salamati ke raaston par chala, aur har tarah ki gumraahiyon se nikaal kar hame noor ki taraf la aur zaahiri wa baatini har qisam ki saari be-

hayaiyon se hame bacha. Aye Allah ! hamari sama'at o basaarat aur hamare quloob me aur isi tarah hamare biwi bacchon me barkat ataa farma aur hamari toubah qabool farmakar ham par inaayat farma. Tu bada inaayat farmane waala bada meherbaan hai. Aur hame apni nematon ka shukr guzaar aur sana khwaan aur qadr ke saath qabool karne waala bana. Aur hame apni wo nematein bhar poor ataa farma. (Tabrani, Hakim)

34. Aye mere rab ! mere nafs ko taqwe se aaraastah farma aur (uski gandagiyan door famakar) usko pakeezah bana de. Tu hi sab se accha pakeezah banane waala hai. Tu hi uska wali aur maalik o moula hai. (Musnad e Ahmad)

35. Aye Allah ! mai tujhse maangta hun "Nafs e Mutmainnah" yani aisa nafs jisko teri taraf se itminaan aur jameyyat ki doulat naseeb ho, aur marne ke baad

tere huzoor me haazri ka usko kaamil yaqeen ho aur tere faislon par wo raazi wa mutmayin ho. Aur teri taraf se jo kuch mile wo uspar qaane' ho. (Tabrani)

36. Aye Allah ! tu apne zikr ke liye (yani apni hidayat o naseehat Quran e Paak ke liye) mere dil ke kaan khool de aur mujhe apni aur apne rasool e paak ? ki taabedaari ki aur apni kitaab e paak Quran e Majeed par amal karne ki toufeeq ataa farma. (Tabrani)

37. Aye Allah ! mera haal aisa karde ke tere huzoor me haazir hone tak (yaani marte dam tak) tere qahr o jalaal se mai har waqt is tarah tarsaan wa larzaan rahun ke goya har dam tujhe dekh raha hun, aur apne khouf o taqwa ki doulat naseeb farmakar mujhe khush bakhth karde. Aur aisa na ho ke teri nafarmani karke mai bad-bakthi me mubtala hojaun. (Tabrani)

38. Aye Allah ! mujhe wo aankhein

naseeb farma jo tere azaab aur ghazab ke khouf se aasuon ki baarish barsa kar dil ko sairaab karein, us ghadi ke aane se pehle jab bohot si aankhein khoon ke aansoo royeingi aur bohot se mujrimeen ki daadhi angaarah hojayengi. (Ibne asaakir)

39. Aye Allah ! aisa karde ke kayinaat ki saari cheezon se ziyadah mujhe teri muhabbat ho aur saari cheezon se ziyadah mujhe tera khouf ho. Aur apni mulaqaat ke shouq ko mujh par itna taari karde ke duniya ki saari hajaton ka eahsaas uski wajah se fana hojaye. Aur jaha tu bohot se ahle duniya ko unki margobaat dekar unki aankhein thandi karta hai, tu meri aankhein ita'at o ibaadat se thandi kar (yani mujhe ibadat ka wo zouq o shokh baksh de, ke usme meri aankhon ki thandak ho aur phir mujhe ibadat ki bharpoor toufeeq de). (Abi Nuaim)

40. Aye mere Allah ! mai tujhse teri muhabbat maangta hun, aur apne un bandon ki muhabbat bhi ataa farma jo tujhse muhabbat karte hain. Aur un aamaal ki bhi muhabbat mujhe ataa farma jo teri muhabbat ke muqaam tak pahunchate hon. (Tirmidhi)

41. Aye Allah ! meri chaahat aur pasand ki jo cheezein tu ne mujhe ataa farmayi hain unse mujhe un kaamon me taqwiyaat pahuncha jo tujhe mehboob hain. Aur meri raghbat o chaahat ki jo cheezein tu ne mujhe ataa nahi farmayi (aur mere aouqaat ko unse faarigh rakkha) tu mujhe toufeeq de ke mai us faraagh ko un kaamon me istemaal karun jo tujhe mehboob hain. (Tirmidhi)

42. Aye Allah ! mere dil me bhali baatein ilhaam farma aur mere nafs ke shar se mujhe bachaa aur apni panaah me rakh. (Tirmidhi)

43. Aye dilon ko palath ne waale ! mere dil ko apne deen par saabit o qaayim rakh. (Tirmidhi)

44. Aye Allah ! mai tera ek kamzoor bandah hun, tu apni raza talabi ki raah me meri kamzoori ko quwwat se badl de, aur meri peshani pakad kar mera rukh khair ki taraf karde. Aur Islam ko meri sab se badi pasand bana. Aye mere Allah mai zaeef hun, tu mujhe qawi banade. Mai zillat o pasti e hun tu mujhe buland o ba-izzat banade. Mai mohtaaj hun, tu mujhe ghani banade. (Tabrani)

45. Aye Allah ! tu khaaliq e kul hai, fayyaz o kareem hai. Tujhe teri buland sifaat ka sadqah ! meri maghfirat farmade. Mujh par rehem farma, mujhe aafiyat naseeb kar, meri rozi me barkat de, mere uyoob ko chupade, meri himmat badha, mujhe izzat o sarbulandi naseeb farma, mujhe seedha raastah dikha aur gumraahi se bacha. Aur mujhe

apni rehmat se jannat me dakhil farma
aye arhamur rahimeem (Dailami)

46. Aye Allah ! mai teri panaah chaahta
hun balaon ki sakhti se, bad-bakthi se,
buri taqdeer se aur dushmano ki
kaamiyaabi se. (Bukhari)

47. Aye Allah ! mai tujhse panaah
chaahta hun fikron se, ghamon se, be-
himmati se, kaahili aur buzdili se. Bukhl
o kanjoosi se aur qarze ke baar aur
logon ke dabao se. (Bukhari)

48. Aye Allah ! mai susti, kahili se,
intehayi budhape se aur qarz ke boojh
se teri panaah chaahta hun. Isi tarah
dozakh ke azaab se, dozakh ki
aazmayish se, qabr ki aazmayish se bhi
teri panaah chaahta hun. Mall-daari ke
shar se, ghareebi ke shar se aur dajjal
ke shar se bhi teri panaah chaahta hun.

49. Aye Allah ! mere gunaahon ko apne
rehmat ke thande paani se dho-daal,
mere dil ko gunaahon ki gandagi se saaf

kapde ki tarah paak farmade. Mere aur gunaahon ke darmiyaan mashriq o maghrib ka faasla farmad. (Bukhari)

50. Aye Allah ! mai aise ilm se teri panaah chaahta hun jo mujhe nafa na d. (yaani amal ki toufeeq na ho) aur aise dil se panaah chaahta hun jo tujhse darta na ho. aur aise nafs se jo sair nahi hota, aur aisi dua se jo maqbool na ho. (Muslim)

51. Aye Allah ! mai nematon ke zaail hojane se, aafiyat o salaamati ke phir jaane se, nagahaani aafaton ke aane se aur teri har naraazgi se teri anaah chaahta hun. (Muslim)

52. Aye Allah ! mai aapas ke ikhtelaaf, nifaaq aur bure akhlaaq se teri panaah chaahta hun. (Abu dawood)

53. Aye Allah ! mai bhook ki shiddat aur khiyanat ki burayi se teri panaah chaahta hun. (ibne majah).

54. Aye Allah ! mai bars, juzaam,

junoon aur tamaam moozi, gandi beemaariyon se teri panaah chaahta hun. Mujhe apni hifazat me rakh. (Nasai)

55. Aye Allah ! mai kisi cheez ke neechе dab-jaane se, kisi buland jagah se gir-padne se, kisi jagah doob jaane se, aag me jal jaane se aur intehaayi budhape ki zillat se teri panaah chaahta hun. Is se bhi panaah chaahta hun ke mout ke waqt shaitaan mujh par ghaalb aajaye. Is se bhi panaah chaahta hun ke mai kabhi maidaan e jihaad se peeth dikha kar bhaagne lagun. Is se bhi panaah chaahta hun ke mujhe kisi zehreele jaanwar ke dasne se mout aajaaye. (Nasai)

*Allahumma salli alaa
Muhammad wa alaa aali
Muhammad wa baarik wa sallim*

Amal mukhtasar sawaab ziyadah

Allah ke Nabi sallallahu alaihi wasallam ne apni ahliya Hazrat Juveriah raziyaallahu anha ko fajar se lekar chasht tak musalsal zikr me baithe dekha to aap ne unko yeh 4 kalimaat sikhaye jisko 3 martaba kehne se us se bhi ziyadah sawaab milta hai jitna fajar se chasht tak zikr karne se milta hai. wo kalimaat yeh hain:

- 1. Subhanallahi wa bihamdihi
adada khalqihi,**
- 2. wa riza nafsiki,**
- 3. wa zinata arshihi,**
- 4. wa midaada kalimaatihi**

(Sahih muslim: 4/2090; Tirmidhi: 5/477)

Hamari tamam kitabein www.idara.info
ya facebook.com/idaraashrafululoom se
aap muft download karsakte hain.

Idara Ashraful Uloom Trust,
Hyderabad.

“Idara Ashraful Uloom” riyasat e telangana wa andhra ka ek mashoor aur qaabil e eitemaad idara hai, jo guzistah 31 saal se millat ki deeni, ilmi, amali khidmaat anjaam de raha hai. Aur mulk ki badi dars-gaahon me ek numaya muqaam haasil karchuka hai. Is idare ke liye tamaam ahle khair hazrat se appeal hai ke, apni duaon ke saath saath maali ta’awun ke liye aage aaye. Aur mazhab o tehzeeb ki hifazat ka fareezah anjaam dekar sawaab e darain haasil farmayein.

Idara Ashraful Uloom Trust,
17-1-391/2/79/A, Khaja bagh,
Sayeedabad, Hyd-59
Day school: 24551251, 24556487
Hostel: 24070681, Cell: 9848623931
A/C: 8627101000016245 Bank of India